



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 3

US Open: Malvika Bansod semi-finals-i iogo

Jharkhand assembly election nung BJP atsüngdoktsü: Hemant Soren

VOL. XXI ISSUE NO. 258 (ADOK 258)

DIMAPUR AMUNGNÜ (SUNDAY)

AAMI (JUNE) 30, 2024

₹ 5.00

ULB election tiptema agiogo: SEC

Dimapur, June 29, 2024 (TYO): Dimapur district nung verification, checking maparen dak alaka ULB Election 2024 indang votes azüngba mapa mapang shitak nung tembangogo ta State Election Commissioner, T. John Longkumer, IPS (Retd)-i ashi.

ULB election nung tilateri tatalokba kar dak alaka tiptema dang agiogo. Mokochung nung Congress party Returning Officer kati ken o benok aser Dimapur Ward 4 nung nisung kati votes aika enoktsüba atema re-poll agi ta pai ashi.

"Polling anogo jakdang state kübok tesem balala nung police-i nisung 553 tashi 'preventive detention' nung ayur iba nung Dimapur nung nisung 300 tema dena liasü" ta pai ashi.

Advisor Hekani Jakhalu-i Dimapur nung polling station tem telungi aiba video tem social media nung prokshiba atema asüngdangdang "iba atema onok dangi ken o ka dang maru lir. Ajisüaka iba tatalokba bushisüngdang südar aser report anguba sülen sorkar dang abentsü" ta SEC John Longkumer-isa metetdaksü.

Nagaland Municipal Act ajanga polling station nung

tenüng malir shinga temelaba magii telungi aitsü memelar, ta paisa shisem.

Chiephobozou Town Council nung tetokteper shinga melii takok anguba NDPP candidate Kiyasetuo Kenguruse ket nung lijak, lijaklung aser walkie-talkie bena lia apuba atema asüngdangdang "law & order ya SEC ket nung mali saka iba ama tatalokba atema pei pei political party-i mapa inyaksüla" ta John Longkumer-isa metetdaksü.

"Polling anogo gari ka nung prangpong ka apu, raratepba atema ken o 21 benok aser nisung 22 apu. Dimapur nung polling station ka telongtet nung Rs. 2,48,730 apu saka bushitepa aodang senji shishilembar ka mapa atema liasü" ta SEC John Longkumer-isa ashi.

"Civil Administration, Election staff, Nagaland Police, NGOs, Church Organizations, Tribal Hohos aser polling personnel-i mapa tajung inyakba ajanga State Election Commission-i election tiptema ketdangsüa agitetba atema telok aser nisung ajak dang pelar" ta paisa metetdaksü.

Nagaland putiotsü nung tang mezüng atema tetsür candidate 198 liasü aser tetsürtemi polling nung shilem tulu agia liasü, ta SEC-isa ashi.

Criminal Laws tasen 3 atema workshop agi

Dimapur, June 29, 2024 (TYO): June 29, 2024 nü Kohima nung New Criminal Laws tasen asem atema One-day Media Workshop 'VARTALAP' ayongzüka agiogo.

Iba sentong ya Press Information Bureau (PIB), Kohima, Ministry of Information & Broadcasting ajanga ayongzük.

Iba sentong nung tetushi süa jaokerji Editor, NEPS News, Oken Jeet Sandham liasü aser pai oi jembidang "Criminal Laws tasen asem ya tejentem den kasa dang lir kechiyong özüng 70% nungi 80% tashi lir" ta ashi.

"Nagaland State-i Arrla 371(A) kübok jenjang balaka angur saka asenoki Criminal laws aser Customary laws tsüngda tebandang jungjunga angatetsüla" ta pai ashi.

"Criminal laws ya Civil laws dang nungi khenyongi balaka anungji özüng tasentem ajanga tensa azüokba nung tajangzük tulu angutsü imlar" ta Oken Jeet-i ashi.

Shisalen sayur DIG Range, Kohima, Uniel Kichu, IPS-i Criminal Laws tasen asem-Bharatiya Nyay Sanhita (BNS) 2023, Bharatiya Nagarik Suraksha Sanhita (BNSS) 2023 aser Bharatiya Sakshya Adhiniyam (BSA) 2023 indang jembu.

"BNS 2023 ajanga Indian Penal Code 1860 (IPC) melener aser iba nung tanur tetsür dak

loktii tashiyim mapa inyakba nung arishi küm telatet agiener. Iba özüng ajanga arishi küm 18 teküpok tetsür dak loktii tashiyim agi shi nung medemba atema tasüba temerenshi agütsütsü latettsür" ta Uniel Kichu-i ashi.

"BNSS 2023 ajanga Code of Criminal Procedure 1898 melener. CrPC nung nisung aputsü, ken o benoktsü aser bail indang maparen lir. BNSS law ajanga forensic investigation asütsü nenshir aser küm 7 mesüra teimba tepuokdak ayutsü temerenshi latettsür" ta paisa ashi.

Maneni BSA law ajanga Indian Evidence Act of 1872 (IEA) melener. Iba özüng ajanga electronic mesüra digital records ya paper records den kasa ta züngshir, Uniel Kichu-isa ashi. "Criminal Laws tasen asem ya Parliament nung agizükba sülen December 25, 2023 nü India President-ia agizükogoo. Item özüng ajanga mapang shitak nung temeten agtsütsü aser tetsür o tanur dak özüng alema inyakba nung temulung agütsür. Criminal Laws tasen asem ya India nung July 1, 2024 nungi benshi tenzüksü" ta paisa metetdaksü.

Iba sentong nung Assistant Director PIB, Sonikumar Singh-i okila jembu aser Law students, Mass Communication students, IPR Officials, DDK o media nisungtem aden.

Nagaland ULBs election nung NDPP-i takok tulu nguogo



ULB Election, 2024 nung takok angurtem rongnung tanutsüla arishi küm 22 tain Nzanrhoni I. Mozhui-i kulikaket amer ketdangsürtem külemi agiba noksa ka angur.

Kohima, June 29, 2024 (TYO): Nagaland nung taküm Lok Sabha elections nung tamakok anguba sülen Nationalist Democratic Progressive Party (NDPP)-i tawa urban local bodies (ULBs) election nung takok tulu ngutetogo.

Nagaland kübok district 10 nung Urban Local Bodies 24-municipality 3 aser town council 21 atema tanep 8:00 ako nungi centre 16 nung vote azüngtsü tenzüka liasü.

Kohima nung Chiephobozou Town Council kübok ward 9 nung NDPP den tetokteper shinga mali takok ngua liasü.

June 26, 2024 nü polling anogo nung vote enoktsür lakh 2.23 nungi 82% jungnüa shilem agia liasü.

Nagaland nung Municipality 3- Kohima, Mokochung aser Dimapur nung NDPP-i menden teimba nung takok nguogo.

Town councils 21 nungi Wokha, Phek aser Tuli Town Council tem dak alaka ruling NDPP-i menden teimba nung takok nguogo. Taküm ULBs election nung NDPP-i Bhandari aser Niuland town council tem nungbo candidate ka danga metoktepdaksü.

Wokha town council menden 15 nungi NDPP-i menden 7, NCP-i menden 5 aser BJP-i 3 nung takok angur.

Nagaland State Assembly nung Naga Peoples' Front (NPF) MLA ana dang lir saka parnoki Bhandari aser Phek town council tem nung menden teimba nung takok ngutetogo.

Bhandari TC nung NPF-i

menden 9 nungi 6 nung takok angur aser BJP, JDU o Independent-i menden kaka nung takok nguogo.

Phek Town Council nung NPF-i menden 9 nungi 7 nung takok angur.

Niuland TC nung BJP-i menden 9 nungi 6 nung takok angur aser tanüngba asemji Independent temi takok nguogo.

Kohima Municipal Council kübok ward 19 nungi 5 nung NDPP den tetokteper shinga melii takok ngua liasü. Tanü votes azüngdang ano NDPP-i menden 8 nung takok ngua liasü.

Mokochung Municipal Council nunga menden 18 nungi 6 nung NDPP den tetokteper shinga mali takok angur tanü menden 9 nung takok angur.

Tseminyu Town Council nung nübortemi political party ka nem danga takok mengudak. Menden 9 nung NDPP o JDU nati pezüzü aser ka Independent candidate kati takok angur.

Tuli Town Council nunga ward 9 nungi Congress aser BJP nati asemsem, NDPP-i 2 aser Independent-i ka nung takok angur.

ULBs election nung vote tajemtiba agi takok angubaji vote 1 liasü. Changtongya Town Council Ward 8 NDPP candidate Temjennungsang-i Independent candidate A. Limasanen madak vote 1, Pftusero Town Council Ward 6 nung NDPP candidate Kadielhi Mero-i Independent Albert Mero madak vote 1 aser Jalukie Town Council nung Ward 9 nungi Lathaingam Ruangmei-i Independent candidate Wangko madak vote 1

agi takok angur.

Ano, vote teimtiba agi takok angubaji Dimapur Ward 12 nung NDPP candidate Yimkumba-i votes 3344 votes agi Independent candidate Alitemsu Jamir madak takok anguba lir.

Taküm ULBs election nung takok anguba candidate tem rongnung tanutsüla arishi küm 22 tain Nzanrhoni I. Mozhui (BJP) lir. Bhandari Town Council Ward 1 nung lai NPF candidate Hayiana Y. Tungoe madak takok angur.

Ano, takok anguba candidate tem rongnung tantsüla Peren Town Council nung NDPP candidate Sibeule lir. Arishi küm 71 tain Sibeule-i Peren Town Council Ward 6 nung independent candidate Kezaiyilung Thou madak takok angur.

ULBs election nung NDPP-i candidate teimtiba (178) toktepdaksüogoo. Parnok sülen BJP candidate 44, Congress 37, NPP 22, NPF 21, NCP 15, JD(U) 9, RPI (Athawale) 7, LJP 7, Rising Peoples' Party 1 aser Independent 182 liasü.

Ward balala nung candidate 64 den tetokteper melii takok ngua liasü. Parnok ya NDPP nungi 45, BJP nungi 7, NCP nungi 5, Congress nungi 3 aser NPF o Independent anana lir.

Model Code of Conduct agiener

Nagaland nung Municipal aser Town Council election indang results metetdaksüba aser election maparen tembangba ajanga June 29, 2024 ayaterm nungi Model Code of Conduct agiener ta SEC-i taonung metetdaksüogoo.

DAYO-i takok angur ajak nem tenüngsang agütsür

Dimapur, June 29, 2024 (TYO): Dimapur Ao Youth Organisation (DAYO)-i Dimapur nung ULB elections nung takok angur ajak nem tenüngsang agütsüba den külemi parnoki public tenzüksü nangzükba ama inyaka aotsü imlaba metetdaksüogoo.

Commissioner of Police Dimapur den District Administration-i kanga dangjunga

mapa inyakba ajanga election tiptema agitetba atema tenüngsang agütsür ta DAYO-i ashi.

Dimapur Police-i tensa kanga junga azüoka ayuba ya Dimapur sensotemi nguogo aser iba ya tarutsü election tem nunga tatishitsü süa benshitsü, ta parnoki ashi.

Nagaland nung urban local bodies ajak nung shilem asemsü

nungi ka nung tetsürtem lir anungji policy, sentong tajungtem atonga inyaksü aser maongka jenti agütsütsü imlar ta Media Cell DAYO-isa metetdaksü.

DAYO-i maneni councilors inyaksangshu nung tenük yoka repringtsü aser senso ajak dang Dimapur tajungba yanglushiba nung shilem agitsü mepishir ta parnokisa ashi.

CM Rio-i Shoppers Stop's First Store lapoktsü



Nagaland CM Neiphiu Rio-i, Dimapur nung Shoppers Stop's First Store lapoktsüba noksa nung angur. (Dimapur, June 29, 2024)

Dimapur, Aami/June 29 (TYO): India's premium fashion, beauty and gifting omnichannel destination Shoppers Stop-i, Khermahal Police Point, Dimapur nung parnok indang mezüngbuba store lapokba sangdongogo.

Iba store ya Nagaland Chief Minister Neiphiu Rio-i lapokja liasü. Iba Shoppers Stop store tasenba yagi Dimapur aser temeket nung aliba nüburtem atema shishilembatsü asoshi tajangshiba tasen ka agütsütsü.

Shoppers Stop atsülanga aotsü asoshi sentong yanglur aliba nung iba store lapokba ya shilem ka lir, aser iba ajanga yimti nung alirtem nem direct aser indirect employment maongka agüja local rongseketzung renlokba nung tongtibang shilem agitsü. Store nung front-end staff noklang nung noklang Nagaland nungi dang lir.

Shoppers Stop store tasen amenokba sülen Dimapur nung alirtemi brand 500 dak tema, latest fashion trends, anütetsü, yangku aser sempet agütsütsü atema oset balala kilem ka

kübok ajak angutsü. Shishilembaba jenjang ajungketja Shoppers Stop-isa, beauty makeovers aser Personal Shopper amala service tem agütsütsü. Iba den bendenloksema Shoppers Stop First Citizens Club program ajanga shishilembatsü atema tajangshiba balaka agütsütsü. Premium Black Card Membership program ajanga shishilembartem nem tangar dang nungi maongka balaka agütsütsü, parnok sentong balala atema jaoktsü, küm ka return policy aser züngoksemba sülen sen 50,000 alang tajangzük agütsütsü.

Dimapur nung company indang store tasen lapokba indang jembiba mapang Customer Care Associate, Managing Director, aser CEO, Shoppers Stop Limited Kavindra Mishra-i, "Northeast ya onok atema tongtibang shishilembadak ka lir aser Dimapur nung onok indang mezüngbuba store lapokba atema kanga pelar. Iba store ajanga premium fashion, beauty, aser gifting offerings tem

Nagaland nung aliba nüburtem nem agütsütsü. Iba store lapokba ya onok atsülangshia aotsü asoshi sentong yanglur aliba nung alizüng tongtibang ka tongtetba lir. Iba den bendenloksema local tem mapanung anioka local rongsenketzung ajungkettsü atema nongita yaritsü aser mapang inyakttsü atema maongka agütsütsü onok nükjidong lir," ta ashi.

India nung retail industry renloka aoba mapang Shoppers Stop maneni melenshia renlokyonga odar. Shoppers Stop nung international, national, aser exclusive brand tema angutsü. Dimapur nung Shoppers Stop store tasenba nung nungtugu brand aika angutsü, koba shishilembadak Shoppers Stop nung dang angutsü. Iba store nung Paris Histon, Bentley, Tommy Hilfiger, Chopard, Guess, Prada, Versace, American Eagle, Rare Rabbit, LP, Allen Solly, Vero Moda, MAC amala international fashion brand tem indang süoshi aser oset balala angutsü.

Alongkima nung shisatokden sentong ka agi



Alongkima, Aami/June 29 (TYO): June 28 nü Alongkima town nung Jangpetkong Kaketshir Telungjem Mungdang-i achaayanga Tetsü Oshi Terenlok omen nung ajemdaker shisatokden sentong ka agi. Iba sentong nung tongti-

O jembir Wb.I. Temjen Tzüdir, Coordinator Ao Riju liasü. Iba shisatokden sentong nung jangpetkong nung aliba yimtsüngtem aser sub units tem nungi Yimden, Arogo, tesayur aser kaketshir 120-i shilem agia liasü.

Tongti-o jembir-i tetsü oshi renloka aser wazüka ayutsü asoshi lokti balala ajanga koda tongtipang shilem agitsü, iba indang tesayuba agütsüba den kulemi asen tetsü oshi zülumen Koda lirumedema amshitsü iba indang tesayuba agütsü.

DDMA Chumoukedima-i tetuyuba agütsü

Dimapur, Aami/June 29 (TYO): Chumoukedima district nung tzübo (ring well) atuba mapang nisung yiruba aser asüba dak sendakba nung District Disaster Management Authority (DDMA), Chumoukedima-i tzübo atuba mapang kümdangshia alitsü atema tetuyuba kar agütsüogo.

1. Tzübo atutsü atema mapang tajungtibaji takok mapang lir. Iba mapang ali telung nung aliba tsü kanga ajema kümer alir.
2. Tzübo atuba mapang teyarir kabosa anirang atutsüla.
3. Tzübo telungi aiba mapang süngzü amshiang.

4. Tzübo tuyonga aiba mapang ali anenra anenatokang.
5. Tzübo matuba mapangbo nembanga yuang. Iba ajanga tanur mesüra shiruru tzübo telungi aitsü aliba nungi kümzüksü.
6. Ring well indang diameter ji süklep asembose asütsüla ajita asünung dang mapa inyakertem sadema inyaktetsü.
7. Tzübo atuba mapang lendong kar danga atalokra ken o dak sendaka aliba ketdangsurtem nem osang agüjang mesüra iba helpline number 8732093078 nem osang agüjang.

KohimaDC-igari senzüsenpongtsü atema tetuyuba agütsü

Dimapur, Aami/June 29 (TYO): Tzünglu medangi aruba ajanga Lerie Chazou Chainage KM 185+700 National Highway-02, Kohima-Mao Road nung anentsüh alur aliba dak sendakba nung DC Kohima, Kumar Ramnikant-i gari senzüsenpongtsü atema tetuyuba ka agütsüogo.

anentsüh tali alutsü kecha shiteta mali, kechiyong iba tesem nung ali anük anüka kümer lir. Anungji iba dak sendakba nung nüburtem dang iba lenmang ajanga süiba mapang kanga kümdaktsü metetdaksüogo. Maneni gari tilatembo Cathedral/Little Flower Higher Secondary School-Aradura-New Reserve (Police Union Baptist Church) ajang senzütsü atema tetuyuba agütsüogo.

Anentsüh alur alibatem merkteta lenmang yanglushiba maparen tinyakdak lir, ajisüaka

LFI nung Annual Freshers' Meet 2024 mungogo



Dimapur, Aami/June 29 (TYO): Livingstone Foundation International nung June 29 nü Annual Freshers' Meet 2024 ayongzuka mungogo. Iba sentong ya LFI Auditorium nung 2 ako nungi tenzuka agia liasü.

Mr. Medotso Peseyie, Mr. Fresher 2023 nungeri tendanga liasü.

Sentong ya Moasunep Longchar, Yangernok Lemtor, Ishika Jaiswal aser Pratiksha Prem Sharmanunger lenisüba nung agi, kong kaketshirtemi sentong tapu balala agia liasü.

Final Questionnaire Round tembangba sülen Grade-XI Science nungi Mandira Rai nem Miss Fresher 2024 naroküm agütsü aser Grade-XI Science nungisa Lohrii Pfoyoio nem Mr. Fresher 2024 naroküm agüja liasü.

Freshers' Meet sentong ya Grade-XII Science kaketshir Moiayang Mukho-i sarasademer tenzük aser LFI Head Boy Kewigiakhai Mpom-i lokti pela aguizükba o jembir. Iba sülen Mr. & Miss Fresher tetoktepba sentong agi, kong Grade-XI nung kaketshir tasentemi parnok metetpela liasü. Sentong nungsa Grade-XII teburtemi 'May Zone' ta nungja agütsür tsüngsang ka saya liasü.

Taküm atema Most Talented Fresher naroküm Grade-XI Science nungi Ajonba Thunru nem agütsü aser Grade-XI Commerce nungi Yuvika Aye aser Grade-XI Arts nungi Azutha K. Achumi na nem Best Ethnic Wear aser Best Personality naroküm agüja liasü. Tetoktepba result ya Director LFI Ani Yepthomi-i sangdonga liasü.

Mr. & Miss Fresher tetoktepba talent round nung kaketshir tasentemi parnok dak aketba sempet tajungtiba sayua liasü. Tetoktepba ya Ani Yepthomi, Director LFI, Talikaba Longkumer, Zhimoholi S. Zhimomi, Chaplain LFI, Alice Konyak, Ms. Fresher 2023 aser

Maneni sentong nung 'Nachle Baliye' ta nungja agütsür Grades-XII Arts aser Commerce kaketshir temi tsüngsang ka ai, Grade-XII Arts kaketshirtemi Fashion show ka saya aser Ravineizo Rio-i aser Jigsel Karma Phuntsho nati 'Contemplate' ken tena liasü. Sentong ya Mr. & Miss Fresher 2024-i tepela o jembiba sülen tembanga liasü.



June 29, 2024 nü Hyderabad nung taoba mapang linük tatong tir, M Venkaiah Naidu-i Andhra Pradesh nung taoba mapang minister, asür Dharmapuri Srinivas mangjak nung akhüm agütsüdüng tangokba noksa nung angur.

Ladakh nung LAC anasa Tank exercise agidang sepai 5 asü

New Delhi, Aami/June 29 (Agencies): Ladakh nung LAC (Line of Actual Control) anasa sepaitem tank nung training agiba mapang T-72 tank ka tüzümsüng agi mobanga iba lendong nung Junior Commissioned Officer (JCO) ka densema sepai pongu süogo. Daulat Beg Oldie area nung tank exercise agiba mapang ayong ajangdang tüzümsüng agi tank ji metsüngbang, aser iba tank nung aliba sepai ponguprongla tasü mang ngutetogo.

Ladakh kübok Saser Brangsa anasa Shyok ayong nung tank ka belemoker alidang ajungbena tüzümsüng aru. Leh nung amenoka aliba defense PRO, 14 Corps-i iba lendong atalokba osangji metetdaksü. Kümzüka maparen inyaksü atema sepaitem yok saka tüzü level atuba den külemi tüzü current tesashi asüba ajanga tank nung alirtemji shinga mekümzüktet. Anepongi 3:00 ako meta Line of Actual Control (LAC) anasa iba lendong atalok. Iba

tesemji Leh nungi kilometer 148 shi pilar lir. Iba lendong nung Junior Commissioned Officer (JCO) ka aser sepai pezü asü. Tasü mang pongupronglaji ngutetogo, ta ketdangsertemi metetdaksü. Honibarnü Union Defence Minister, Rajnath Singh-i X ajanga, "Ladakh nung tank ka ayong adena aodang lendong ataloka tasütait Indian army pongu asüba osang angashia jashir. Asen sepaitemi linük atema taküm bendanga agütsübaaji asenoki kodanga mamatoktsü," ta metetdaksü.

JDU-i PM Modi ajurua Bihar atema 'special status' akhangtsü

New Delhi/Patna, June 29 (Agencies): Honibarnü Delhi nung Janata Dal United (JDU) party office nung JDU national executive senden tembangogo; iba senden nungji party-i Centre sorkar dang Bihar state atema temeja maongka meshitsü atema bangzüng ka renemogo. JDU lenir aser Bihar Chief Minister Nitish Kumar-i party-i asentenshir state atema temeja maongka meshitsü mesüra Centre nung NDA sorkar dang senotsü teyari balaka meshitsü benokba sülen party-i ibaji agizüka bangzüng ka renem. Honibarnü party executive senden tembangba sülen osangbenertem den jembidang JDU lenir tain kati, "Bihar atema maongka balaka mesüra senotsü teyari balaka akhangbaji onoki tamalen nungi akhangba lir, aser

maneni iba takhangba agütsür. Kobi melii Lok Sabha aser Rajya Sabha nung party lenirtem aser ozü lenir Lallan Singh aser Sanjay Jha nungeri Ato kilonser ajurua iba takhangba agütsüsü," ta metetdaksü. JD(U) MP, Sanjay Jha maneni party working president shimogo. Party lenirtem dang pelaba lemsatepdang Jha-i, "Chief Minister Nitish Kumar-i kü nem khuret tuluka agütsüogo. Ni pa dang pelar. CM-i Bihar nung temelenshi bener arutsüogo," ta ashi. Party national executive senden tembangba sülen Bihar Minister aser JD(U) lenir, Dr Ashok Choudhary-i, "Bihar atema maongka balaka mesüra senotsü alakteta akhangba ya onoki tamalen nungi akhangba lir,

aser maneni iba takhangba agütsür," ta metetdaksü. Sanjay Jha-i, "Bihar (Lok Sabha) election nung onoki menden 40 nungi menden 30 tashi nung takok ngua liasü. State nung assembly menden 243 nungi onoki menden 177 angu," ta ashi. NEET exam ochimashi ken o dak sendakba nung tasüngdangba ka langzüdüng pai, party-i NEET examination nung ochimashi ya jungjunga bushisüngdangtsü onoki mepishir, ta ashi. Paise, NEET question paper leak asüba ken o nung aibelenertem nem temerenshi tulu agütsüsüla, ta ashi. Exam nung ochimashi balala nokdangtsü atema Parliament nung ozüng tesashi agizüktü atema party-i akhanger, ta JDU lenirisa metetdaksü.

West Bengal Angh Bose-i CM Mamata Banerjee anema ken o benok

Kolkata, June 29 (Agencies): West Bengal Angh, CV Ananda Bose-i pa tenüng menüktüsüba atema Chief Minister, Mamata Banerjee anema Calcutta High Court nung ken o ka benokogo. Anogo ka tejaklen Mamata Banerjee-i, tetsürtemi Raj Bhavan-i mouner, kechiyong yangji tashishitsüsa mapatem inyaker ta shiogo, ta jembia liasü. Trinamool Congress (TMC) tongti lenir Mamata Banerjee aija Bose-i, ketdangsertemi olulu aser tangar tenüng menüktüsüba otem mejembitsüla, ta ashi. Bose-isa TMC lenirtem kar anema-a kasa ken o benokogo. Brihostibarnü state secretariat nung senden ka nung jembidang Mamata Banerjee-i, "Tetsürtemi kü dang parnoki Raj Bhavan semdangtsü tsübur, aser ibaji tawa yangji (Raj Bhavan) tatalokbatem ajanga lir ta shiogo," ta jembia liasü. Taküm May 2 nü Raj Bhavan nung contract nung inyaker tetsür kati, Bose-i la dak tim mesüi benschia liasü ta tai

tongloktsüba sülen Kolkata Police-ia bushisüngdang tenzüokogo. O s a n g b e n e r t e m i asüngdangba langzüdüng TMC Rajya Sabha MP, Dola Sen-i "Ni party lenirtem den o melemtepibo iba atema jembitsü makok. Kechi atalokar ni party lenirtem den tama jembitsü nüngdak," ta metetdaksü. Ano külen BJP lenir, Rahul Sinha-i, Bose-i telemtetba shidak agia inyakogo, ta ashi. Sinha-i, "Angh, Bose-i telemtetba shidak agiogo ta ni bilemer. Shidakba agibo pai tamalen nungi iba telemtetba agitsüla liasü. Iba onük nung ni pa pusemer," ta ashi. Ano CPI(M) lenir, Sujan Chakraborty-ibo, Bose aser Mamata Banerjee na tsüngda toktepba agi state-i teyari kecha mangur, ta ashi. "Iba ya ajanga asenoki takoksa dang angur. Tenati linük temzüng kübok peipei teinyaktsü shilem amadoker asütsüa akok. Tena inyaksangshi ajanga linük jenjang nung West Bengal tenüng menüktüsü," ta Chakraborty-i ashi.

Jharkhand assembly election nung BJP atsüngdoktsü: Hemant Soren



June 29, 2024 nü Ranchi nung taoba mapang Jharkhand chief minister aser JMM lenir, Hemant Soren-i party nung inyakerterem den jembidang tangokba noksa nung angur. Hokolbarnü Jharkhand High Court-i Soren nem bail agütsüba sülen mapang tatsüka tsüngda pa jail nungi chioka liasü.

Ranchi, June 29 (Agencies): Honibarnü taoba mapang Jharkhand nung chief minister inyaksang, Hemant Soren-i, taruba assembly election nung state nung BJP atsüngdoktsü, ta ashi. Honibarnü par kidang JMM party nung inyakerterem den jembidang Hemant Soren-i, "Ni jail nung puoktsü atema ni anema asalentong yanglurtem anema inyaksü aser Jharkhand nung nüburtemi BJP nem tatok magütsüsü," ta ashi. "BJP indang tasü mang süngden nung tatembangbuba kojat angenoktsüsü atema mapang tongogo. Tarutsü anogotem nung Jharkhand nungi BJP atsüngdoktsü," ta JMM executive president, Soren-isa metetdaksü. Ali ochimashi ken o nung ita pongu tejaklen Soren apuba sülen pa Birsa Munda Jail nung puoka liasü. Hokolbarnü Jharkhand high court-i pa nem bail agütsüba sülen ghonda ishika tsüngda pa jail nungi chiok. Mezüng bushisüngdang

ajanga Soren-i aibelenali ama reprangteter aser pa nem bail agütsüyonga pai ozüng alema meinyaktsü, ta reprangteta court-i pa nem bail agütsü. Ali acre 8.36 ochimashi ken o dak sendakba nung taküm January 31 nü lir Enforcement Directorate (ED)-i Soren pua liasü. Soren-i, BJP-i linük temzüng kübok reju ajunga azüoker, ajisüaka tawa Lok Sabha election nung nüburtemi BJP dang tansütsü lesson ka sayuogo, ta ashi. "Parnoki (BJP) assembly election mapang atsüzüker jelia agitsü sentong yanglur, ta ni osang angazükogo. Ni parnok dang mashie anogo ka nung election ayongzüktü jazüker. BJP-i Jharkhand assembly elections nung takok angutsü mangdang ayubaji pongmang dang asütsü. State aika nung BJP-i tribal lenirtem Chief Minister shimer, ajisüaka parnokji 'rubber stamps' ama dang amshir," ta Soren-isa metetdaksü.



June 29, 2024 nü New Delhi nung Odisha Chief Minister, Mohan Charan Majhi-i taoba mapang Ato kilonser, Atal Bihari Vajpayee indang memorial Sadaiv Atal semdanga asür nem akhüm agütsüdüng tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, JUNE (AAMI) 30, 2024

Kati ka khu abenba

Asenok Yisui sayuba nung anidaker Khristantem asoshi ozüngsa benshitsüba mapaji kati ka khu tongzüktepa abenba ya asütsü. Kati ka khu melenzüka abenba tetezüji tangar timtem ngur meima yariba lir. Aji oda, Yisui asenok dang kati ka den meimteptsü indang Lashiba nung aiben shia lir. Paisa Yohan 15:17 nung asenok rongnung kati ka den meimteptsü atema ozüng agütsüba asenoki angur. Ano, Mathi 5:44 nungbo asenok kati ka den meimteptsübaji dang masü saka asen tsükchir danga meimtsü asoshi shia lir. Item o ajak jagi asenok dang shinübaji asenoki tangar timtemertem yaritsüla. Atangji, asenoki angatetsüba kaji, Tsüngremi asen jenjang memetet ser tangar ka yaritsüsa kodanga majurudaktsütsü. Aji oda, kodang asenoki nüngdakba purtem kar yaritsü bilemtetdir mesüra reprangtetdir, Tsüngremi asenok nem parnokji yaritsüsa tashi aser temoatsü agüja lir tabilemdi. Galatia 6:2 nung, tenyar Paulii Galatia nungertem dangi züluba shidi nung, kati ka khu bentepang ta ashiba tetezüji, tangari arua parnok khu benloktsüra aji benang ta ashirba masü saka asenoki tangar nüngdak reprangteta yaritsü indang ashir. Ibaji tang ama, asenok tashidak wara tamajung nokdangtsü asoshi akhi ki alu mapa meinyakdaktsüi songtemba ajanga nisung aika pei kibonga memesütetsüsa tensa tia ka ajuruba mapang ya Khristan-tem asoshi tapet teinyaktsü mapa ka asütsü. Atangji, tangar-tangar timtem reprangtsübaji mapa temela masü aser aiben asenok tezüdanga adoker. Ajisüaka, kodang asenokitangar yaritsüsa tensa mapang ka tenjidir, asenoki itemji paidoktsü memerangtsüla saka Tsüngrem dangang, Kibuba, ni kechi koma yaridaktsüner ? ta asündangtsübajiang tim mapa ka asütsü. Asenoki aiben timtemer yaritsü reprangtet dang, khuret tulu amai bilemer aser asenoki yaritsü koka liaka paidoktsü meranger. Ibaji asenok asoshi tatidang asütsü, anungji iba tatidang nungji metsüktsü kumdangtsübaji kanga tongtibang lir. Aiben Tsüngrem ya yaa tzüraba nisung ama kümer arur. Ibayongji, ni yaa alidang chiyongdaktsü, tzüraa alidang jemdaktsü aser mangsa alidang abendaktsü ta Tsüngremi asenok dang ashitsü ta Yisui ashiba Mathi 25 nung shia angur. Aji oda, asenoki nisung kar yaa tzüraa aser mangsa timtema angubaji, asenoki Tsüngrem angur amai bilemra, atangji, asenok asoshi ibaji asen akaba endokba mapang masü saka temoatsü aniokba mapang ka asütsü. Ashiko, aiben asenoki tangar timtemer aser nüngdakba purtem khu mebentsünüba agi mesüra meyarinüba agi Tsüngrem nungi pilatsüa akok, kechiyong 1 Yohan 4:8 nung ashiba ama, Tsüngremji temeim lir aser shirnoki temeim mapa meinyakner parnokji Tsüngrem memeimer. Asenok asoshi tekümdangtsübaji aji lir. Iba jagiang, Yisui ashiba ama, tenyar Paul-ia asenok kati ka khu tongzüktepa abenba agi Tsüngrem ozüng ataloktsür ta ashiba asenoki Galatia tapu nungji shia angutsü. Tanü putu nung, tanü ya asenok asoshi timtemtsü tetenzüker. Shidi asünungbo, tang yabo timmatemer, saka kodang yamaisa odir, sangküm kumbo chiyongtsüa mangu ayatsü. Ibaji yimdangi arua asenoki tang ya tarutsü nung shinga timmatemtsüsa kati ka den shisalemsatempa inyaktsübaji tongtibang asütsü. Asenokbo asen taküm aser kibong jenjang indang khen bilemdangdi aser tangar dang nungi jenjang tajungba nung lir ta angatetra, Tsüngremi asenok nem tangar khuret abentsüsa tashi, maongka aser taküm tajung agütsüogo ta bilemdi aser kati ka khuret reprangteta bentepdi.

OLEMSABANG

LUSHITSÜ MAKOKBA TESASATSÜ

~ M.Meren Ex.Pastor Ungma

(Yashi adok nungi...)

Iba sülen liyonga arudang joko Naga limai khrista yimsü arur küm 150 abensaba benjung Impur nung longsua mongogo, aser kasaji Molungyimsen nunger Arogoa kasaji küm 150 abensaba benjungmong amongtsü pelashishia kiyongkinar Arogo jaok aser ABAM lenir o jembitsü jaok nung maotsü nokdang. Anungji Dr.Clark ajanga tenzükba Clark Mission yim anaprongla nung ABAM-i jentok, sürabangla ABAM Jubilee amongba jia kobala ka nung ajemdaker amonger? Tanü Clark taküm ali asübo pai koda jashila, America nungi tzüyim tuluba ajanga ita 6 tashi nungang memetetba lima ka pungteta, idakji Khrista osang tajung sangdongtsü pei taküm aser kibong ajunga bendanga agütsüba asadangtsü makokba temeim mapa agi asen nübur kotaker nisung kümdakja anitetba mapaji Naga nungeri amatsü no? süra tanü pa mapa yamai metibuluja sensamasatsütsüsa adokba ken o ya Clark tejak nung anak paloktsüba mesüka lir.

British Sorkar mapang yimtsüng shia nung Alimapurtem o tamanger na tsüngta anogo shia ama tsüka-oka nung dang ken o jembia aru, aser tatem nung British nunger SDO court-i nunga tua idakji Arogo nunger o alimapurtem na o bendanger aruba yimpu temangna nung yamaji Arogo nunger case agia court nung dang nokdaka aruba ajurua aruogo. Tanü ka süali ka süali, na asüyonga ni asüyonga courti monüra ka o ka na tsüngta ken o matoktsüsa tai memenatsü tim, saka kati danga aibelen mapa tamajung kar danga inyakra aser taitok magütsütepi court nung ken o agütsüra anaprongla court nungji nokdaktsüsa akümstüsbaji tim lir ta onokibo bilemer. Saka ka süali ka süali courti monüra aibelen meinyaktsüla.

Baptist Arogo ya shingaia Shinga Arogo alena mali, kechiyong asenok Arogoji pei pei Independent, anungji par Arogo ana jagi koba anogo nung jubilee mesüra sentong kar yanglua mongner aji par molung masü no?

Mungdangbo 1872 December 22 ji amongtsü ta lemtetkaji aji tejangja aser iba nungji amongtsü shibai nokdangtsü aka?

Taoba putu mapangbo Mungdang nung ken o kar atsütepa jembir telemeni metemtetra lokti nung teka metongtep vote agitep, shirnokisa mulunger teka sayuang ta mendeni ashitsü aser aji nisung kwi züngdangtsü, aser memelongertemi teka sayuang ta ashitsü aser itemjia tekaji züngdangtsü aser shirnok timba parnokji mulungbaji agitsü ta benshia aru, aser makokertem jagi ashitsü joko onoka nenok den atener ta asütsü saka makokertem jagi kechisüdir süaka onokibo memulunger ta shira idakji o matemtsü ta yamaji inyaktepa aru, kechiyong asenok Khristanpurtem tashiyim agi bener aoba mapa kecha maka, anungji kechisarina nung atsüanem ka inyaktsü nüngdaker. Aser Mungdangbo Arogotem nung timtem kar atokra itemji yimjung yanglutsütsüba nükjitong nung alitsüla, saka ka kenü ka kenü ta jentoktsü lenmang bushi nungbo Aoli Arogotem shiba dak mulung süngzüktsü?

Aser oda ashir ashi Aoli nung Mungdang aser Arogo meimertem Rev.tem tantsü tambutemi yimjung nung dang ken oji tembangjangni ta shitangba o-bo teküpia mai toktsü, Tanü lanu putu aser tashi-temetet putu asü nung nenok lanu putu mulung sangni, anungji tambur o-bo kecha menüngdak akümer, saka Solomon chir Rehoboami pei pur o dang angar tambur sayu o jentokba agi Israel yimlibo ana akümba bilemtetdangmano? Tanü asüng tashirtem alima koda ajungtsü ta bilemer masü, saka pei süpo apidang Nagaland nung Mungdang anana akümba ishika lingo. Anungji Aoli tashirtem kanga shisadanga lokti anitsü merangangni.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Papua New Guinea nung Arogo kati nisung 300,000 baptitsüogo



Papua New Guinea nung Seventh-Day Adventist Arogoi ayongzükba baptiba sentong nung tangokba noksa nung angur.

June 29, 2024: Tawa Papua New Guinea nung Seventh-Day Adventist Arogoi nisung 300,000 dak tema baptitsüogo, ta Arogoi metetdaksü.

South Pacific Division, Papua New Guinea Union Mission (PNGUM), General Conference aser Adventist World Radio-i senteper bapbiba sentongji ayongzükba liasü.

Baptiba sentongji hopta ana piyong agi aser tongti ketdangserji Seventh-Day Adventist world church Tir, pastor Ted Wilson liasü.

New Guinea tesem ajaklen pastor Ted aser pa kinüngtsü Nancy nati tanela asentenshi sentongtem nung Tsüngrem O jembia liasü.

May 19 nü Ted Wilson-i,

"South Pacific Division aser Papua New Guinea Union Mission nati 'PNG for Christ' kübok tang tashi nung nisung 278,369 baptiogo ta metetdaksü aser tesem 2000 dak tema nungi shilem 52-i dang osang yoka lir. Iba ya Tsüngremer sayatena lir! Ano item ama osang aika angashitsü," ta metetdaksü.

Tesülen paisa, Papua New Guinea nung Tanela Temeshi ajanga mapa inyaka tang tashi nung nisung 300,000 dak tema baptiogo, ta metetdaksü.

Nisung jenti baptiba yong tzübo kar nungbo khenyongi nisung 1,000 tashi baptija liasü.

Adventist Arogoisa temesepba mozü shibelenertemi temesepba

mozü jenti rongdokba sülen baptiba, tepuokdak alirtem aika baptiba, yimtsüing kar nungbo yim ajak tamangertem akümba aser shiranger anepertem jenti aliba osang lemsatop.

PNGUM nung personal ministry director, Pastor Miller Kuso-i PNG for Christ den yaritepa liasü. Iba crusade kübok linük tesem balala nung sentong 2,000 dak tema agi.

Pastor Miller Kuso-i, "Asen linük nung tesem balala semdangtetba ya ni asoshi maongka tulu liasü. International sayutsüingirtem 300 longjemba atema pelar. Papua New Guinea nung nüburtem den tekümtet osang lemsateptetba atema pelar," ta metetdaksü.

ANO GO ABEN TSÜNGREM DEN

SARASADEM TASHI

Anepdang yakta ano manga alidang, Yisui shishir kimai adoka azüngmeyakdak tesem kati aenshia ao, aser yangji pai sarasadem. Mark 1:35

Anepdang Yisu nütsüing Simon aser pa den alirtemi Yisu bushi, iba mapang Yisu azüngmeyakdak tesem kisu senshia or sarasadema liasü. Kechiba süra iba anogo Yisu aser nütsüingtem sayutsüing aotsüba liasü. Yisu Khristai, pa tenyaba mapa meinyakdang Tebu nem teinyaktsü ajak bendanga agütsü. Pai tanela terenemshiba mapang tamasa agia liasü. Yisu Khrista alima nung alidang pai mapa agi pa nütsüingtem aser nüburtem dang koda sarasademtsü sayu aser sarasadem nung tashi aliba indang jangja-jangja sayu.

Khristan taküm nung sarasademji sobutsü akümtsü kanga tongtibang. Tenyaba mapa aser tenzükba mapa nung tamasa Tsüngrem nem bendanga agütsütsü nungdak. Tanela aser shi terenemshiba mapang tamasa agiba ajanga tanelar tongpang akoker. Tsüngremer mangdang aser tetuyuba tali jangja meteter, aser Tsüngem tashi medeniang tenyaba mapa takok mongutet.

Amangertem shiai Tsüngrem den pei tesntaktep akanga ayutsü kangasa nungdaker. Kija taküm Tsüngrem nem bendanga agütsütsü atema mapang agitsü kanga nungdaker. Tesadang ka dang masü, saka Tsüngrem nem ajak bendanga agütsütsüla. Asen sasa khuret abenba kecha nunga koktetba aser temoatsü anguba mali. Tsüngrem nem ajak agütsüdi. Amen

America nunger ajaki lumia sarasademtsüla: Pastor Jack Hibbs


June 29, 2024: California nung aliba Calvary Chapel Chino Hills Arogo nung Pastor, Jack Hibbs-i America nunger ajak, talisa Khristanem dang taruba ita piyong linük atema lumia sarasademba sentong nung shilem agidaksüner, ta ayongzük.

Amongnü sayutsüingidang pastor Hibbs-i Arogo züingsemtem dang, July 1 nungi tenzükba Tennessee state aser linük atema anogo 30 tashi lumia sarasademtsü atema tayongzükba agüja Republican Governor, Bill Lee-i bill ka nung sign süogo, ta metetdaksü.

Pastor Hibbs-isa America nung aliba pastor tem ajak aser Khristan ajak dang "Join Tennessee" nungji shilem agia lumia sarasademtsü ayongzük. Pastor Hibbs-i, "Tanelai jembiba angashitsüsa asenok tenarong lir. Tanela temeshi ajanga Tennessee aser governor aser nüburtem dang America atema sarasademtsü ajungshir," ta ashi.

"Asenok California nung alirtemia kasaji inyaktet. Taruba July ita nung asenok ajak Tennessee nunger kümer lumia sarasademdi," ta pai ayongzük.

"America nunger aser Arogotem amoi oa aliba nungi saaktsü asoshi Tsüngremi atar asütsüa akok," ta pai ashi. Paisa Arogo züingsemtem



Pastor, Jack Hibbs

dang, "Tsüngrem dang tanela temeshi milakji Tennessee nung dang masü saka asen California nunga jangrudakjang ta asenoki sarasademdi," ta ayongzük.

Governor Lee-i sign asüba bangzüng nungji yamai shia lir, "Tennessee General Assembly nung nüburtem tenzükertem ama asenoki asen lima nung Tsüngrem taochi bushir aser Tsüngrem dang asenok nem agütsüba temoatsü soita mayutsü mepishir. Asenoki asen temenentem aser metokmeperi Pa matsüingdang nangzükter aser tatok meshir."

Kasa bangzüng nungji yamai zülua lir, "Kibuba Yisu dang asen lima anepjang, rara agienang, nisung shibelenba, temesepba mozü achiba aser ochimashi agienjang ta mepishir. Tanela temeshi ajanga sorkar takdangtem, classrooms aser Tenla kitem süngjang aser onok kidang tesünep, temeim aser tepela lidakjang ta sarasademmer."

Uganda nung Baptist sayutsüingir ka tepset



Sayutsüingir, Richard Malinga tepseter aliba noksa nung angur.

Nairobi (Kenya), June 29 (Agencies): Uganda nung Baptist sayutsüingir kati Muslim nungertem aika Yisu Khrista dangi anir aruba ajanga Islam yimsü alia amanger Muslim nungertemi amokmerena aruba sülen tesüsa June 17 nü tepsetogo.

Sayutsüingir, Richard Malinga tasü mangji Butebo District kübok Akisim Ayimdak anasa aliba tzüta ka nung angu; pa arrshi küm 36 liasü.

Pallisa district nung aliba Baptist Arogo kati kibongtem sema Khrista osangtajung

lemsateptsü atema Richard yoka liasü, ta Arogo nung pastor-i metetdaksü.

Butebo District nung osangtajung sayutsüingitsü atema June 17 anepdang-a pa Pallisa District nungi apusoa liasü aser iba anogo nungjia Muslim nunger aikati Khrista agizük.

"Ajisüaka June 17 nikonkdang Malinga-i phone nung text message ka ajanga pa Muslim nungertemi longbanga lir ta kü nem metetdaksü. Ni-a pa dangi text message yok saka telangzüba kecha mangu," ta

ka lisü agi alener azü yima sür lia angu," ta metetdaksü.

Iba sülen nisungba jagi Malinga indang phone ajanga pastor den tongtepratep aser pastor den Butebo District nung aliba police iba tesem jagi oa tasü mangji Butebo District-i bener aru.

Pastor-i, "Arogo ka ama onok kanga jashia mangyimer. Pai kanga nendaka Tsüngrem tenzükogo aser pai sayutsüingiba ajanga Muslim nunger densema nisung aika Khrista dangi anir aruogo," ta metetdaksü.

pastor-i metetdaksü.

Budaka, Kadama, Butebo aser Pallisa district tem nung Islam yimsü alia amanger Muslim nungertemi sayutsüingir Malinga aibena mokmerena aruogo, ta pastor-i ashi.

Akisim Ayimdak alir kati, "Aonung 7:30 ako meta ni nisung ka anüngba ola angashi. Onok iba tesemji tonga aodangbo nisung

AO OSHI ANGAZÜKDAK:
TANÜ ANGAZÜKTSÜBA OJANG



Tagizükba

(n) meshia ayuba (receive)

* Taküm nung tagizükba ajakbo tajung masür.

Tagizüksü

(adj) tangutsü aliba (about to get)

* Ni mapa inyakba sen tagizüksü mali agimar liasü.

OLONG PAITEP # 6832

1			2		3		4		5
6		7							
					8				
9				10					
							11		
			12						13
	14								15
					16				
			17						
								18	
19									

TIPIEN

- 2. Teburtemi tejak nung awaba - (8)
- 6. T___em - (3)
- 8. Tzüik ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzu angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaktsü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6831 TELANGZÜBA

TIPIEN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN :

- 1. Tenükjang, 2. Luden,
- 3. Kioktsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.

NAI-A YA METETTER MA



US kübok Missouri nung Maxine Cole aser lar adianu pungui otsü tasen ka yangluogo ta Guinness World Records ajanga ashir. Cole'er adianutem ya "group of siblings with the oldest combined age in the world" lir. Parnok ajak senteper küm 550 tema lir. Par adianutsür trok ya Farmington nung Overall family nung aso. Tang tashi par trokprongla taküm lir aser tantsüla Norma Jacob (101), la sülen Lorene Kollmeyer (98), Maxine Cole (97), Doris Griffith (94), Margaret Norton (90) aser Elma Jennings (88) lir. Par trokprong arishi küm meyoktep nung küm 571 lir.

Mizoram nung yimjung bener arutsü atema IPS toktsü: CM Lalduhoma



Aizawl, June 29, 2024

(Agencies): India sorkar aser Mizo National Front (MNF) telungpurtem tsüingda yimjung mapa inyaktsü atema Indian Police Service (IPS) mapa toktsü ta Mizoram chief minister Lalduhoma-i ashi.

Lalduhoma-i 1977 nung IPS mapa inyaktsü tenzük saka 1984 nung mapa toktsür politics nung tetsüing ajemok.

Mizoram peace accord sign sütepba tenüing nung 'Remna Ni' benjung nung o jembidang "taoba Prime Minister Indira Gandhi aser taoba MNF president Laldenga nati India sorkar aser MNF tsüingda yimjung yanglutsü mapa inyaktsü ashiba angaa IPS ketdangsür nungi anen" ta Lalduhoma-i ashi.

"Mizoram nung yimjung bener arutsü atema Prime Minister Indira Gandhi aser Laldenga nati mepishiba sülen ni Indian Police Service nungi anen. Iba mapa toktsüba sülen London nung Laldenga den ajuruteptsü atema ao aser MNF-i India sorkar dang akhangba onük aika renem" ta pai ashi.

Mizo Zirlai Pawl (MZP)-i Hokolbarnü Remna Ni benjung ayongzuka among. Shitakba

agibo iba anogo ya June 30 nü amonger saka taküm Deobar ajuruba agi atsüker among.

1986 küm MNF aser Indian sorkar tsüingda yimjung tenangzüktep sign sütepba nung MZP-i tongti shilem agiba atema pelar ta CM Lalduhoma-i ashi.

"Mizoram peace accord mapa nung party lennirtem, arogotem aser taoba state chief secretary Lalkhama nungeri kanga meranga inyakba atema pelar. Talisa Mizo nunger temeten atema inyakdang taküm bendanga agütsür ajak nem tetushi agütsür" ta paisa metetdaksü.

"Alima nung Zo nunger ajak longjema aser putepa alitsü ayongzük. Manipur, Myanmar aser Bangladesh nung Zo nungeri timtem ajuruba ya Zo nunger longjemtsüba temoatsü ka ama züingshir" ta Mizoram CM-isa ashi.

2018 nungi MZP-i peace accord sign sütepba nung tongti shilem agia arurtem nem tenüingsang agüja Remna Ni benjung monga arur.

Taküm benjung nung 1981 küm yimjung olemtep tejakleni aotsü atema MLA menden toktsürtem nem tetushi agüja among.

Mizoram peace accord ya June 30, 1986 nü Centre aser taoba MNF tsüingda sign sütep aser iba ajanga küm 20 tashi telungpur khuret aliba agien.

MNF ya taoba Mizoram chief minister late Laldenga-i anir tentet. 1950s tatemlen Assam state nung Mizo nunger alidak ayawara adokba nung Centre-i teyari magütsüba atema tejashi nung MNF tenzük.

MNF-i tim agi mapa inyaka aruba sülen 1966 aser 1986 tsüingda prangpong amer rara. Iba jagi 1987 küm India sorkari MNF ya ozüingi memelaba telok ta tenokdangba agütsü.

May 1971 nung Mizo district council-i taoba Prime Minister Indira Gandhi den ajuruteptem aser Mizo nunger atema state balaka meshi.

Iba takhangba nung ajemdaker India sorkari Mizo Hills nungi Union Territory akümtsü shidang aser January 1972 nung ibaji inyak. Iba sülen February 20, 1987 nü Mizoram ya India nung state 23 buba aküm.

1986 küm temai adokba sülen MNF ya political party ka aküm aser tang Mizoram nung opposition party lir.

Manipur kübok district 3 nung prangpong-injang angu

Imphal, June 29, 2024

(Agencies): Manipur nung taoba ghonda 24 tsüingda Myanmar den artsü anasa aliba tesemtem mita ao.

Churachandpur district kübok Samulamlan, Songphel, New Bijang aser Lamsai yimtsüingtem nung central & state forces-i mita ao.

Tengnoupal District nung parnoki Leithokching aser Chandel District nung Singtam aser Toupokpi yimtsüingtem mita ao.

Iba mapang prangpon-injang aika apu aser itemji Improved Long-range heavy Mortar, two-inch fired shell, SLRs with magazines, 12-bore single-

barrel rifles, 315 Rifle with magazine, Improved heavy mortar, Improved Mortar (Pompi), Grenades, Radio sets aser 59 live ammunition rounds ngutet.

Iba mapang central aser state forces-i apuba prangpong-injang ajak pei pei police station ket nung agütsüogo.

Meghalaya sorkari HNLC atema teyari meshitsür

Guwahati, June 29, 2024

(Agencies): Meghalaya sorkari Hynniewtreap National Liberation Council (HNLC) takhangbatem agizük ama kümogo.

Ita aika yimjung maparen meinyakteti aruba sülen Chief Minister Conrad K Sangma-i HNLC züingsemtem yaritsü

olen ka shiogo.

"Centre sorkar aser HNLC den amnesty atema jembidar. Iba ya ozüing alema mapa tila inyakbatem atema asütsü saka mapa tamajung inyakbatembo ka khen ka ta angadangsü" ta Conrad Sangma-i ashi.

Tawa HNLC sleeper cell

züngsem kar apubaji tangatetba nung inyaktertem masü saka senotsü ajangzüksü atema inyaktertem lir, ta paisa ashi.

HNLC aser tanga telungpur teloktemi tashiyim agi sen saruba mapa sorkari azüoktsü meranger ta CM Conrad-isa metetdaksü.

Iran-i Israel nem tekümdangtsü metetdaksü

Tehran, Aami/June 29 (Agencies): Lebanon nung rara metenzüksü atema Iran-i Israel nem tekümdangtsü metetdaksüogo aser ashiba agi, iba ajanga takoksa tulu ajangshiba rara ka tenzüksü, ta Islamic republic indang United Nations mission-i sangdong ka ajanga metetdaksü.

"Resistance Fronts densemsüba densema lenmang ajak asadangdar," ta mission-i, middle east nung Iran den sendaktepa aliba teloktem indang ateshia Hokolbar aonung X sabang ajanga metetdaksü.

Israel-i Lebanon nung Hezbollah pur amaksü amokmerenba ya "psychological warfare" aser "propaganda" ka lir ta parnokoshi.

October 7 nü nungi Gaza nung mangatettep tenzükba sülen linük ana arrtsü nung anogoshia Israel nung sepaitem aser Hezbollah telok khatepa aruar.

Iba ita Ato Kilonser Benjamin Netanyahu-i, Lebanon nung meita aoba sentong tesashi ka agitsü atema Israel renemdar ta ashiba sülen iba mangatettep ajanga rara tulu ka tenzüksü akok ta tsübuabilemer.

Israel nung sepaitem Lebanon anüoletip nung Hezbollah pur amendaka aliba tesem ishika makogo, ta Israel army otongdar kati Honibarnü metetdaksü.

"Taoba ghonda ishika tsüngda rara dang amshiba tayimtsü temi Hezbollah pur amendaka aliba tesem ishika makogo, kong Zabqin tesem nung par telok tamendakdak, Khiam nung operational infrastructure ana aser al-Adissa [Odaisseh] nung Hezbollah pur indang ki ka makogo," ta Israeli Yedioth Ahronoth osang kaket ajanga metetdaksü.

"Onoki yimden yimsüsüba

dak ajemdaker tangatettep ka dangi arrtsü atema inyaktepdar, koba lenmang tajungtiba lir," ta Gallant-i Hokolbarnü Lebanon den arrtsü nung amendaka aliba Israel nung sepaitem semdangba mapang ashi.

Gallant-i iba hopta United States nung ashiba agi, tia tensa ajak atema Israel renemdar.

"Rara tenzükra onoki Lebanon nung teraksatsüba tulu bener arrtsütsü, ta Hezbollah-i angateta lir," ta pai Washington, DC nung ashi.

Hezbollah tekolakba Hassan Nasrallah-i, Israel-i Lebanon makra kecha talenba aser taziökba maliba rara tulu ka tenzüksü ta amokmerenogo.

Mangatettep tali küma aoba mapang ka nung Germany, Canada, Netherlands aser United States densema linük aikati parnok lisopurtem dang Lebanon-i toktsütsü mesüra maotsü atema tetuyuba agütsüogo.

Pakistan-i 'Operation Azm-i-Istehkam' atema US dang teyari meshi

Islamabad, Aami/June 29 (Agencies): US dangi Pakistan indang ambassador-i, Operation Azm-i-Istehkam takok ngua benoktsü atema par linük nem prangbong tilatem aser modern equipment tem agütsütsü mepeshia süngdangogo. Operation Azm-i-Istehkam ya tawa Islamabad-i agizüker aliba kiralongrara anema inyakyim ka lir.

Federal sorkari tawa national counter-terrorism drive sentong agizüko.

"Pakistan-i, kiralongrara samatsütsü atema Azm-i-Istehkam sentong amenokogo. Iba atema sophisticated small arms aser communication equipment tem nüngdaker," ta Ambassador Masood Khan-i ashiba, Dawn osang kaket sangdong ka ajanga metetdaksü.

Iba hopta tetenzüklen Wilson Centre nung Washington think tank nung US nung policy yanglurtem, scholars, intelligentsia, aser corporate lenirtem den o jembiba mapang pai iba olen ya lemsatop.

Khan-i, 'Azm-i-Istehkam' kübok onük asem; doctrinal, societal, aser operational lir ta ashi. Paisa, mezüngbuba shilem ana atema mapa tenzükatokogo aser tasembuba takaratiba nung benoka inyaksangshitsü, ta ashi.

Pakistan nung Tehreek-i-Taliban teloki asendenshir tesem balala aika maka aoba mapang kiralongrar anema operation tasen ka tenzüksü asoshi telemtetba agiogo. Ketdangsurtemi ashiba agi, Tehreek-i-Taliban pur ya Afghanistan nung amendaka lir.

Khan-isa, Pakistan aser US na security tesendaktep takang ayutsüla, itangitertem tesendaktep akangshitsüla, advanced military platforms

tema ayokba tenzüksütsüla aser US nung yangluba defence hadirtem anepalutsü atema teyari agütsüteptsüla, ta ashi.

"Iba ya regional security atema aser kiralongrartem nokdangtsü atema kanga tongtibang lir, koba ajanga US aser parnok den sendaka aliba linüktemi tejangraba dak kongshir," ta pai ashi.

Maneni Khan-i, bilateral tesendaktepji kechia ataloka odar iba dak ajemdaksüla aser ken o kar ajanga tetsükdaksü madokdaksütsüla, ta ashi.

"Tanabuba nung ken o ka ana ajanga tesendaktep ajanga meraksadaksütsüla," ta pai ashi.

Pai ashiba agi, temaba jenjang nung defence sensaksem, mapang shia senden amenba aser Inspired Union-2024, Falcon Talon, aser Red Flag amala joint military exercises tem ajanga Pakistan aser US na defence tesendaktep tajungba kümdaksütsü.

Khan-i, Kabul nung diplomatic tsendaktep aser Afghanistan nung counterterrorism aser tetsürtem temeden atema inyakba mapang US-i Pakistan ya partner ka ama agitsü asoshi asadangtsüla, ta shidang.

Kasa mapang nung US State Department-i Pakistan pusemba metetdaksüogo.

June 26 nü tasügdangba ka langzüba mapang State Department otongdar Matthew Miller-i, "kiralongrar anema raraba mapang onoki Pakistan pusemer," ta ashi.

"Kiralongrartemi tesem balala amakba ajanga Pakistan nungertem kanga kangshio. Kiralongrartem inyakyim ajanga linük ka danga yamai tim matemtsüla," ta pai ashi.

Nepal anentsüh lendong nung nisung 9 asü



Kathmandu, Aami/June 29 (Agencies): Nepal anüolen tzünglu kanga sashia aruba ajanga anentsüh aluba sülen tanur asem densema nisung teku süogo, ta ketdangsur kati Honoibarnü metetdaksü.

Kathmandu nungi anüolen km 250 shi pilar Gulmi district kübok Malika yimtsüng nung kibong ka nungi nisung pongu mejanger aliba mapang parnok mejanga aliba ki anentsüh agi anenzüka bener aoa liasü, ta National Disaster Rescue and Reduction Management Authority otongdar Dizan Bhattarai-i ashi.

"Parnok ponguprongla tasü mang ngutetogo," ta Bhattarai-i Reuters dang ashiba den, asürtem rongnung tanur

ana densema liasü, ta shisem.

Kidanger Syangja district nunga tetsür ka aser lar arishi küm asem tain jala nata anentsü agi lar ki anenzüka bener aoba sülen süogo. Gulmi den arrtsü nung aliba Baglung district nunga nisung ana anentsüh agi anenbanga süogo.

June tom nungi tzünglu kanga sashia aru tenzükba sülen tang tashi nung Nepal nung tsüngi agi aiba, anentsüh aser tziümsüng lendong nung nisung 35 süogo. Nepal nung tzünglu ya September tom tashi arur.

Nepal nung tzüngluruwa mapang tenem nung aliba tesemtem nung anentsüh aser tziümsüng lendong kanga bulua ataloker aser kümshia nisung 100 aika asür.

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND: KOHIMA

NO.DET-2/14/2001/PT-II/302 **Dated Kohima, the 29th June, 2024**

ADVERTISEMENT

Application in the prescribed form is hereby invited from bonafide local candidates for undergoing training at various Govt. Industrial Training Institutes under Craftsmen Training Scheme for the session 2024-2025/26.

Name of the Institutes, sanctioned trades, duration of courses and minimum Educational qualification required are given below:

SESSION: 2024-2025/26						
Sl.No	Trades	Duration of Course	Minimum Educational Qualification	Seating Capacity	Name of Govt. ITIs	
A. Engineering Trades					*NCVET	**SCVT
1.	Wood Work Technician	1 year	8 th Passed	24 each	Kohima, Phek, Wokha, Tuensang, Kiphire	Kohima, Mon.
2.	Plumber	1 year	8 th Passed	20 each	-	Kohima, Phek, Zunheboto.
3.	Welder	1 year	8 th Passed	20 each	Kohima.	-
4.	Mason (Building Constructor)	1 year	8 th Passed	20 each	-	Kohima.
5.	Mechanic Diesel	1 year	10 th Passed with Math & Science	24 each	Kohima.	Tuensang
6.	Electrician	2 years	10 th Passed with Math & Science	20 each	Kohima, Mokokchung, Wokha	Tuensang, Zunheboto
7.	Electronic Mechanic	2 years	10 th Passed with Math & Science	20 each	-	Mokokchung
8.	Fitter	2 years	10 th Passed with Math & Science	20 each	Kohima	-
9.	Draughtsman (Civil)	2 years	10 th Passed with Math & Science	24 each	Kohima	-
10.	Mechanic Motor Vehicle	2 years	10 th Passed with Math & Science	24 each	Kohima	Phek
11.	Surveyor	2 years	10 th Passed with Math & Science	24 each	Kohima	-
B. Non-Engineering Trades.					*NCVET	*SCVT
1.	Basic Cosmetology	1 year	10 th Passed	20 each	-	Kohima, Phek, Chümoukedima.
2.	Computer Operator & Programming Assistant (COPA)	1 year	10 th Passed	24 each	Mokokchung, Zunheboto, Mon.	Kohima, Wokha, Chümoukedima.
3.	Knitting	1 year	8 th Passed	20 each	-	Kohima, Mon.
4.	Sewing Technology	1 year	8 th Passed	20 each	Chümoukedima, Kiphire.	Kohima, Mon, Tuensang, Wokha, Phek, Zunheboto.
5.	Stenographer Secretarial Assistant	1 year	10 th Passed	20 each	-	Chümoukedima, Mokokchung.

*NCVET- National Council for Vocational Education and Training (Under Central Govt.)
**SCVT- State Council for Vocational Training (Under State Govt.)

N.B:

- Candidates applying for admission must be above 14 (fourteen) years of age as on 1st August, 2024 and there is no upper age limit.
- Application form will be issued from respective Govt. ITI on any working day during office hours. e.f. 08/07/24 (Monday).
- Seating capacity for trades under SCVT is 20 nos each except Sewing Technology trade at Govt. ITI, Kohima is 40 (Forty) Nos.
- Cost of Application Form is R. 100/- (Rupees Hundred) only.
- Last date of submission of form is 25th July, 2024 (Thursday).
- Date of Entrance test:

a).	30 th July, 2024 (Tuesday)	Non Engg. Trades	Morning -10:00 am (under Matric Trades) Afternoon -12:00 pm (Matriculate Trades)
b).	31 st July, 2024 (Wednesday)	Engg. Trades	Morning -10:00 am (under Matric Trades) Afternoon -12:00 pm (Matriculate Trades)

7. Entrance Test result will be declared on 7th August, 2024 (Wednesday).
8. Only women candidates need apply for Women ITI, Chümoukedima.
9. Selected candidates will be paid stipend @ R.500/-PM.
10. 4% of the seats will be reserved for Person with Disability (PWD) for admission to ITIs.
11. Combined selection of candidates shall be done on the basis of merit in the written test to be conducted in each ITI as indicated above.
12. If the number of applicants fall below 10 (ten) in a Trade in a specific ITI, no admission shall be taken up. The candidates of such trades shall be admitted to other ITIs in the same trade, subject to availability of seats.

Sd/-
KOVI MEYASE, NCS
Secretary
& Ex-Officio Director (HoD)

HI-i tetsür coaching camp atema asayar 33 shimogo



Aami/June 29, 2024

(Agencies): Hockey India-i Honibarnü sangdong ka ajanga tetsür coaching camp ka atema asayar 33 tenüing sangdongogo.

Iba training camp ya SAI center nung Hombarnü nungi tenzüka ita ana agitsü renema lir.

London aser Antwerp nung FIH Hockey Pro League season nung asaya ajak nung tamakok anguba sülen India tetsür team mapang tatsüka anisüngzüka liasü.

India team-i taoba ita Antwerp nung Belgium aser Argentina na den asaya nung asaya pezüprongla makok aser London nunga parnoki Germany (1-3) aser Great Britain (2-3) nata mekoki liasü.

"Onok tawa Pro League Europe leg atema Antwerp aser London nati oa liasü. Onoki imlaba ama takok mongutet, ajisüka team ka ama onoki aika angazükogo," ta Chief coach Harendra Singh-i ashi.

"Asaya aika nung onok tejakdang liasü aser goal idaktsüsü merangba mapang onoki onok den asayaba team tem nem timtem agüja asayaogo. Team yanglushiba mapang item ajak ya temaitsü tajung lir, aser India tetsür Hockey team ya tarutsü nung kanga tashitait akümtsü ta temulung lema bilemer," ta paisa ashi.

Iba training camp ya August 31 nü tembangtsü.

Training camp atema

asayartem:

Goalkeepers: Savita, Bichu Devi Kharibam, Bansari Solanki, Madhuri Kindo.

Defenders: Nikki Pradhan, Udita, Ishika Chaudhary, Monika, Ropni Kumari, Mahima Choudhary, Jyoti Chhatri, Preeti.

Midfielders: Salima Tete, Marina Lalramnghaki, Vaishnavi Vitthal Phalke, Neha, Jyoti, Edula Jyoti, Baljeet Kaur, Manisha Chauhan, Akshata Abaso Dhekale, Ajmina Kujur.

Forwards: Sunelita Toppo, Mumtaz Khan, Lalremsiami, Sangita Kumari, Deepika, Sharmila Devi, Navneet Kaur, Deepika Soreng, Preeti Dubey, Vandana Katariya, Rutuja Dadaso Pisal.

Argentina aser Chile na dang senchi USD 15,000 achi

Aami/June 29, 2024

(Agencies): South America nung football asaya achaayangba lokti tentet CONMEBOL-i Argentina aser Chile coach, Lionel Scaloni aser Ricardo Gareca na nem temerenshi agütsüogo. Tang asaya aliba Copa America asayamung nung tenati aniba team ground-i menor aruba atema tena merenshiogo.

CONMEBOL-i Hokolbarnü sangdong ka ajanga, coach anaprongla asaya kaka atema tenokdangba agütsüogo, kechiyong tenati aniba team-i asayamung temzüng ozüing sülen manidaki ground-i menro aru, ta metetdaksü.

Taoba hopta Copa America asayamung nung mezüngbuba asaya Canada den asayaba mapang Argentina team asaya

tanabuba shilem asoshi menor aru. Iba sülen Canada coach Jesse Marsch-i tashishiba ka agütsü aser Argentina dang senchi achitsü takhangba agütsü.

Kasa mapang nung Mongolbarnü Argentina den asayaba mapang asaya tanabuba shilem asoshi Gareca-i asayar ka menor yokba atema merenshiogo.

CONMEBOL-i asayamung temzüng ozüing ocet 104 aser 145 dak ajemdaker temerenshi agütsüogo, kong team kati asaya tenzüka aser tenzükhidang mapang shitak amshitsüba shisema lir.

Iba temzüng ozüing sülen manidakba ajanga Scaloni aser Gareca naprongla nem asaya kaka asoshi tenokdangba agütsüogo aser tenati aniba team taruba asaya nung tena

substitutes' bench nung mementetsü.

Iba den bendenloksema team menomeyangba atema Argentine aser Chilean football federations dang USD 15,000 senchi chiogo.

Argentina team Group A nung tang temaba jenjang nung lir aser parnok quarter-finals-i iogo. Parnok taruba asaya Peru den asayatsü, saka Scaloni bo tezü nungi dang asaya repringtetsü.

Kasa mapang nung Chile-i tang tashi nung point ka dang ngua lir aser parnok tatesma Canada den asayatsü.

Tenokdangba agütsüba aser senchi achiba ya temerenshi tesashi amai, saka iba ajanga lateta aliba temzüng ozüing sülen anidaktsü atema coaching staff aser team tem tali kümküma kümdaktsütsü.



2nd Grassroots Open Football Tournament Honibarnü Indira Gandhi Stadium, Kohima nung tembangogo. Asayamung shibangba sentong nung Angami Sports Association (ASA) tir Rokovikho Chale tetushi tejaoker liasü. Iba asayamung ya Nagaland Football Association (NFA) tawabangba kübok K DFA-i ayongzüka U-10, U-13, aser U-15 ta category asem küma lemsar asayaogo. Under-15 category ya Khelo India Centre Greenwood Dimapur-i akok, Under-13 category, Dimapur Sporting Club-i (Soccer Schools Academy) akok aser Under-10 category, Khelo India Centre Kohima-i koka liasü. Asayamung akokba team tem nem senpet sen 10,000 aser tanabuba jenjang nung tembangba team tem nem senpet sen 5,000 agütsüogo. Iba den takokertem nem ano medal, kuli kakat aser takok marok agütsüogo.

Aston Villa-i defender Ian Maatsen alizükogo

Aami/June 29, 2024

(Agencies): Aston Villa-i Netherlands nung defender Ian Maatsen, Premier League nung parnok den toktepa asayaba club Chelsea nungi alizükba Hokolbarnü parnok indang website ajanga metetdaksüogo.

Maatsen sen kwi agi alizük iba indang osang tejangja magütsü, ajisüka British media outlet balala ajanga ashiba agi, pa ya pound million 37.5 agi alizükker alitsü akok.

Arishi küm 22 tain left-back ya Stamford Bridge nungi loan nung oa asayaba mapang Champions League final nung Real Madrid goal 2-0 agi makokba asaya nung Borussia Dortmund team nung densema liasü.

Pa tang Netherlands team nungi Germany nung Euro 2024 nung asayadar. Pa ya Barcelona nungi asayar Frenkie de Jong yiruba ajanga team nung züngoksema liasü.

Villa manager Unai Emery-i pre-season transfer window nung asayar alizükba rongnung Maatsen ya tanabuba asayar lir. Villa-i Everton nungi forward Lewis Dobbin den tenangzüktepa ka yangluogo. Taoba season Premier



Ian Maatsen

League nung pezübuba nung tembangba sülen villa pur Champions League football atema renemshiba mapang lir.

Maatsen Dortmund nung oa asayaba mapang Bundesliga nung 16 ben aser Champions League nung tenetben asayaogo aser iba mapang European quarter-final nung Dortmund puri Atletico Madrid akokba asaya nung pai goal ka idakja laisü.

Pa taoba season Premier League nung Chelsea nungi 12ben asayaogo. Pa Charlton, Coventry aser Burnley nunga loan nung oa asayaogo.

US Open: Malvika Bansod semi-finals-i iogo



Malvika Bansod

Aami/June 29, 2024

(Agencies): India tsür badminton asayar Malvika Bansod-i, tang asaya aliba US Open Super 300 badminton tournament nung Scotland tsür Kristy Gilmour set asem nung koka tetsür kija asaya semifinals tongtetogo.

Nagpur nungi arishi küm 22 tain asayar shiba tang jenjang 49buba nung lir, lai iba asya nung 2014 Commonwealth Games silver medalist Kristy 10-21 21-15 21-10 agi koka liasü.

Malvika-i 2022 küma Hylo Open nung Kristy kokogo. Iba asaya nung Kristy ya set tanabuba nung yiruba ajanga masayatetsüsa aküm. Taoba mapang India tsürla yagi Kristy

anaben tashi mekoki lir.

Malvika, shibai taküm Azerbaijan International challenge koker lir, la semifinal nung sixth seed Japan tsür Natsuki Nidaira den asayatsü.

Kasa asayamung tebur kija asaya quarterfinal nung Priyanshu Rajawat-i kanga junga asayaogo, ajisüka pai China nung fourth seed asayar Lei Lan Xi mekotteti asaya 21-15 11-21 18-21 agi makok. Tena tsüngda ghonda ka dak tema asaya liasü.

Maneni tetsür tarep asaya nung second seed Treasa Jolly aser Gayatri Gopichand nata Japan tsür Rui Hirokami aser Yuna Kato nati 17-21 21-17 19-21 agi koka quarterfinal nung tsükogo.

BILEMDANGANG

"O mekümdangi jembiba ajanga nisung mulung yirur."